



PARTII INUIT INATSISARTUNI

15. oktoberi 2013

UKA 2013/105-1

Siunnersuut uunga: Suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersup allanngortinnissaa pillugu Inatsisartut inatsisaat nr. xx, yy 2013-imeersoq (suliniutinutangisuunut inatsit)
(Inuussutissarsiornermut Aatsitassaqaqarnermullu Naalakkersuisoq)

Saqqummiussisoq:
(Inatsisartunut ilaasortaqaq Randi Broberg Partii Inuit)

Aatsitassarsiornermi suliniutit angissuunik taaneqartartuni Inatsisartut inatsisaanni nr. 25, 18 december 2012-meersup allanngortinneqarnissaanut Naalakkersuisut saqqummiussaannut Partii Inuit imaattumik oqaaseqaateqassaagut.

Suliniutit angisuunik taaneqartartuni, tassalu aatsitassarsiorniarnernerup iluani, nunatsinni suliariniarneqarneranni avaqqunneqarsinnaanngitsumik avataaneersunik tikisitsisariaqartoqartussaana pillugu, akissarsiaqartitsinikkullu erseqqissumik sinaakkuteqartoqartariaqarnera inatsisit pineqartup imarisaa isumannaangassaavoq, inatsisartut inatsisaatigut pittuttuisoqarneratigut.

Taamaattumik Kattuffiit susassaqaqtullu allat tusarniaanikkut kiisalu suliniutinut peqataatinneqarsinnaanerat maluginiarparput, minnerunngitsumillu pisariaqartoqalerneratigut suliumajunnaartoqarsinnaaneranut sinaakkutissat illuatugeriinnit isumaqatigiissutigineqarsimammata maluginiarparput.

Inatsisissatut allanguutissamut erseqqissaassutigineqartut allannguiniarnermilu pisariaqartinneqartut pineqarmata siunnersuummut tapersiissaagut.

Taamatulli oqareerluta ilanngullugu oqaatigisariaqarparput Partii Inuit erseqqissumik kissaatigissammassuk Nunatsinni Inuussutissarsiutinik nutaanik pilersitsiortorniarnermi Nunaqavissut suliffissaqarniarnikkut avataaneersunit ingiarneqarsimalinnginnissaat erseqqinnerpaamik qulakkeersimaneqartariaqarmat.

Inuussutissarsiutit nutaat eqqussorniarnerneranni Nunanit allaneersunit pisariaqartitsinitta tassaalersissanngilaatigut Sulisartoqarnerup iluani avataanit tikisikkumaagassanut isiginnaartuuinnartussat!

Nunatsinni innuttaasut tassaasariaqarput annertunerpaamik periarfissinneqartussat, sulisartoqarnerup iluani, ilinniartitaanermi, minnerunngitsumillu atugarissaarnerulernissamik piumasartaqarnerani.

Suliffeqarfiit avataaneersut arlaqartut tikerelereerput, inuttaasullu qulaatiinnarlugit suliassanik tigooraarusullutik nunatsinnut tikerelereersut maannakkorpiaq isiginnaalereerpavut.

Tammakkua aamma sinaakktissaqartinneqartariaqarput, erseqqissumillu piunasaqarfigineqartariaqarlutik, sulisoqarnerup iluani nunaqavissunik tamatigut salliutitsisariaqarnerannik.

Minnerunngitsumillu sinerissami Nunatsinni sulliviit tamarluinnarmik tassaasariaqarput Nunarsuarmioqatigiit isumaqatigiissutaannut tamatigut naapertuuttumik akissaasorsorfusut atungassaqartitsinikkullu tamakkiissumik inuup pisinnaatitaaffiit naapertuuttumik atungassaqartitsisussat.

Nunatta Karsia immerniaannarlugu immerneqanngisaannassaaq, tamannalu naalakkersuisut oqaatigimmassuk toqqissiallaatigaarput, nunarput tassaalinngisaannassaaq iluanaarniarfik sulisartoqarnikkullu atornerluiffiusumik ingerlatsiffik.

Nunarput tassaasariaqarpoq sulisartoqarnikkut tamakkiissumik inuup pisinnaatitaaffiit naapertuuttumik ingerlatsiffiusussaq.

Taamaammat siunnersuut saqqummiunneqartoq illua'tungeriit sivilunerusumik pitsaasumillu oqaloqatigeereernerisigut ilusilersugaammat iluarisimaagassaavoq, tusarniaanermullu atatillugu inatsimmut annertuunik maalaaruteqartoqannginnera Naalakkersuisut nuannaarutigalugu oqaatigimmassut Partii Inuit nuannaarutigaarput.

Taamatut oqaaseqarlunga siunnersuutip Naalakkersuisunit saqqummiunneqarneranut Partii Inuit tapersiissuteqarpugut.

Qujanaq